

- शिक्षक दिवस माथे आज देश-प्रदेश मांय न्यारा न्यारा कार्यक्रम- राष्ट्रपति द्रौपदी मुर्मू शिक्षा मांय बालिकावां री हिस्सेदारी बध्ण माथे खुशी जताई।
- मुख्यमंत्री भजनलाल शर्मा कयो - देश अर समाज री प्रगति मांय शिक्षकां री महताऊ भूमिका-राज्य थर रा जळसा मांय ठावा शिक्षकां ने सन्मानित करी ज्या।
- पैगम्बर हज़रत मुहम्मद साहब रा जनम दिन ईद मिलाद-उन-नबी माथे आज न्यारी न्यारी ठोडां महफिलां अर जुळूस रा आयोजन।
- प्रदेश मांय मॉनसून री रंगत चाले -28 जिलां सारू आज बिरखा रो अलर्ट।

000

पैली रा राष्ट्रपति अर ख्यातनाम शिक्षाविद् डॉ. सर्वपल्ली राधाकृष्णन रो जनम दिन आज देशभर मांय शिक्षक दिवस रा रूप मांय मनायी ज्यो। नुवी दिल्ली मांय व्ह्या राष्ट्रीय शिक्षक पुरस्कार जळसा मांय राष्ट्रपति द्रौपदी मुर्मू ठावा काम करण वाळा 45 शिक्षकां रो सनमान करयो। ई मौके वणा कयो के शिक्षा परिवार, समाज अर देश रा विकास मांय एक अमोल योगदान देवे है। राष्ट्रपति कह्यो के बेटियां री चोखी शिक्षा ऊं ई देश रा विकास मांय महिलावां री अगवा भूमिका मिल सके है। श्रीमती मुर्मू अजे रा सालां मांय ऊंची शिक्षा दाखिला मांय बालिकावां री बधती तादाद माथे खुशी जतायी।

000

जळसा मांय राजकीय बालिका उच्च माध्यमिक विद्यालय टपूकड़ा री प्रधानाचार्य नीलम यादव ने ई राष्ट्रीय शिक्षक पुरस्कार ऊं सनमानित करी ज्या। श्रीमती यादव ने शिक्षा री गुणवत्ता मांय सुधार अर पढेसरां रा शैक्षिक विकास कानी करी ज्या ठावा कामां सारू ओ ईनाम दीरी ज्यो है। केन्द्रीय शिक्षा मंत्री धर्मेन्द्र प्रधान गुरुआं ने बधाई देवता कयो के शिक्षकां री करडी मेहनत अर समर्पण ऊं ठावो बधावो मिल्यो है। जिण ऊं राष्ट्रीय विकास ने गति मिली है। शिक्षक दिवस माथे जयपुर मांय व्हिया आयोजित राज्य थर रा कार्यक्रम मांय मुख्यमंत्री भजनलाल शर्मा गुरुआं ने देश समाज रा निर्माणकर्ता बतावता कयो के देश अर समाज री प्रगति शिक्षकां रा हाथां मांय है।

000

जळसा मांय ठावी सेवावां सारू प्रदेशभर रा चुणी ज्यो शिक्षकां रो सन्मान करी ज्यो। स्कूल शिक्षा महकमा कानी ऊं व्ह्या कार्यक्रम मांय उपमुख्यमंत्री अर तकनीक अर उच्च शिक्षा मंत्री डॉ. प्रेमचन्द बैरवा अर शिक्षा मंत्री मदन दिलावर ई भेळा व्ह्या। राज्यपाल हरिभाऊ बागडे शिक्षक दिवस माथे प्रदेश रा गुरुजनां ने शुभकामनावां देवता शिक्षकां ने पढेसरां रो जीवन गढ़ण अर वां ने संस्कारवान करण वाळा बताया। जैपर मांय व्हिया एक जळसा मांय राज्यपाल नुवी शिक्षा नीति माथे बतळ करता कयो के आ राष्ट्र विकास ऊं जुड़ी है। वणा कयो के शिक्षक, पढेसर अर समाज रा हितां रा आलोक मांय तैयार करी ज्या है।

000

केन्द्रीय आवासन अर शहरी कार्य मंत्री मनोहर लाल प्रधानमंत्री आवास योजना-शहरी रा दूजा चरण रे तैत अंगीकार 2025 अभियान री सुरूआत करी। अभियान रे दौरान देशभर मांय ई योजना रा बारा मांय घणी जाग जगावण अर प्रधानमंत्री आवास योजना-शहरी रा कार्यान्वयन मांय तेजी लाई जाएला। साथे ई अर्जीदारां रा सत्यापन री प्रक्रिया ई तेज करी जाएला अर पहला ऊं मंजूर घरां री बणाई-चुणायी रा काम बेगा पूरा करया जाएला।

000

राष्ट्रीय स्वयं सेवक संघ की अखिल भारतीय समन्वयक बैठक आज ऊं जोधपुर मांय सरू व्ही। बैठक मांय सरसंघ चालक डॉ. मोहन भागवत अर सर कार्यवाहक दत्तात्रेय होसबाले समेत संघ ऊं जुड़्या न्यारा न्यारा संगठनां रा ठावा ओहदादार भेळा व्हा। मीटिंग मांय भाजपा रा राष्ट्रीय अध्यक्ष जे.पी. नड्डा अर मुख्यमंत्री भजनलाल शर्मा ई शिरकत करी। म्हारा खबरनवीस बतायो के 7 सितम्बर ताई चालण वाळी बैठक मांय संघ की शताब्दी साल की तैयारियां, पंच परिवर्तन, राष्ट्रीय शिक्षा नीति की समीक्षा समेत न्यारा मुद्दां माथे चर्चा करी जावे।

000

पैगंबर हजरत मुहम्मद साहब की जन्मदिन ईद मिलाद-उन-नबी आज धार्मिक उमाव के साथे मनायो जावे। पैगंबर मुहम्मद की डेढ हजारवीं जयंती होवण के कारण आज की दिन खास मानी ज्यो। ई मौके मस्जिदां, दरगाहां अर मुस्लिम बहुतायत हलकां मांय "मिलाद महफिलां" अर "सीरत सम्मेलन" आयोजित कर्या जावे। पैगंबर मुहम्मद की जीवन अर शिक्षा के दरसावता जुळूस निकाळी ज्यो। अजमेर मांय मोहम्मद साहब की यौमे पैदाइश के मौके हजरत मोईनुद्दीन हसन चिश्ती की दरगाह ऊं शानो शौकत के साथे जुळूस निकाळी ज्यो। चित्तौड़गढ़ की कपासन मांय बारह वफात के मौके घणी तादाद मांय अकीदतमंद खास मस्जिद मांय नमाज के पछे एक-दूजा के मुबारकबाद दी।

000

श्रीगंगानगर मांय निकाळी ज्यो जुळूस मांय देशभक्ति की निजारी देखण के मिल्यो, वठे तिरंगा के साथे अकीदतमंद भेळा व्हा। डूंगरपुर मांय निकाळी ज्यो जुळूस-ए- मुहम्मदी मांय शहर काजी की अगुवाई मांय लोगां बैड-बाजां के साथे भागीदारी निभाई। जयपुर मांय शहर की मांय की हलकां ऊं व्हेता जुळूस निकाळ्यो जावे जो करबला ताई पूगेला। बांसवाड़ा, चूरू, सर्वाईमाधोपुर अर दूजा जिलां ऊं ई ईद मिलाद-उन-नबी उमाव के साथे मनाया जावण की समचार है।

000

जयपुर-दिल्ली राजमार्ग माथे यातायात आरामजोग बणावण सारू कसले ऊं चंदवाजी अर शाहजहांपुर के बीच लेन सिस्टम के करडाई ऊं लागू करयो जाएला। ई दौरान तैय लेण ऊं बारे चालण वाळा कारोबारी अर भारी वाहनां की चालाण काट्या जाएला। कोटपूतली-बहरोड़ की जिला परिवहन अहलकार सुनील सैनी बतायो के 25 अगस्त ऊं सरू व्हा ई अभियान की पैला चरण मांय समझाइश ऊं जाग जगाई ज्यो ही।

000

केन्द्रीय वित्तमंत्री निर्मला सीतारामन क्यो है के जीएसटी की नुवी व्यवस्था ऊं लोगां की उपभोग मांय सुधार व्हेला अर इण ऊं पूंजीगत खर्च माथे कोई असर नी पड़ेला। एक समाचार चैनल साथे बतळ मांय सुश्री सीतारामन क्यो के 99 फीसदी चीजां अर सेवावां माथे अबे या तो शून्य या पांच ऊं 18 फीसदी ताई की जीएसटी लागेला। वणा क्यो कै पहली बार केन्द्र सरकार जीएसटी माथे क्षतिपूर्ति मुआवजो अर भेळो प्रस्ताव पारित करयो है। वणा क्यो के पेट्रोलियम अर एल्कोहल उत्पाद जीएसटी की दायरा के बारे होवेला। वित्तमंत्री बतायो के सरकार वां निर्यातकां के मदद देवण की कोशिश माथे काम कर की है, जिण माथे पचास फीसदी अमेरिकी आयात शुल्क की असर पड़्यो है।

000

27वो सरस आजीविका मेळो आज ऊं नुवी दिल्ली की मेजर ध्यानचंद स्टेडियम मांय सरू व्हीयो। 22 सितम्बर ताई चालण वाळा ई मेळा मांय न्यारा-न्यारा राज्यां की स्वयं सहायता समूहां ऊं जुड़ी 400 ऊं बत्ती गांवाई महिलावां हिस्सो ले की है। ई साल की मेळा की मुद्दो है - लखपति दीदियों की निर्माण - सफल उद्यमी और वोकल फॉर लोकल की चैपियन बनने के लिए ग्रामीण महिलाओं की सशक्तिकरण राख्यो ज्यो है। मेळा मांय लखपति दीदियां की हस्तशिल्प, हथकरघा अर खावण की चीजां दरसाई जावे।

000

प्रदेश मांय मॉनसून री रंगत बण्योडी है। आज ई दिखणाद अर अगुणी जिलां मांय घणखरी ठोडां बिरखा री गतिविधियां दर्ज करीजी। मौसम महकमा मुजब लारला चौबीस घंटा मांय सब ऊं बत्ती 12 सेंटीमीटर पाणी बांसवाड़ा रा सल्लोपाट मांय बरस्यो। महकमो 28 जिलां सारू आज बिरखा रो अलर्ट जारी कर्यो है। बांसवाड़ा मांय रेड अलर्ट, जदके बारां, भीलवाड़ा, बूंदी, चित्तौड़गढ़, डूंगरपुर, झालावाड़, सिरोही, कोटा, उदयपुर, प्रतापगढ़, राजसमंद, सलूमबर अर सवाईमाधोपुर सारू बिरखा रो ऑरेंज अलर्ट दीरी ज्यो है। ई बीचे प्रदेश रा घणखरां हलकां मांय व्हे री झमाझम बिरखा ऊं नदी-नाळां उफाण माथे है। केई बंधा ओवर फलो चाले। वठे ई केई बंधा आपरी भराव खमता कने आय गया है।

म्हारा पाली खबरनवीस बतायो के आथूणी राजस्थान रा सब ऊं मोटा जवाई बांध आपरी पूरी खमता रे नजदीक पूग ग्यो है। वठे बंधा रा गेट खोलण ने लेर प्रशासन विचार करे।

000

बांसवाड़ा रा माही बजाज बंधा रा 16 गेट खोलने बरोबर बत्ती रो पाणी निकाळ्यो जावे। अजमेर मांय बोराज तळाब री बिरखा रे कारण काले टूटी पाल ने ठीक करण रो काम चाले। पाळ टूटण हलका री केई कॉलोणियां मांय पाणी भरीज ग्यो। सर वाळा लोगां ने हिफाजती ठोडां पूगाई ज्यो ई। उठी ने दौसा मांय 15 साल ऊं सूखी पड़ी बाणगंगा नदी मांय पाणी आवण माथे गांव वाळा रीत मुजब उण रो स्वागत करयो।

000